

ՀԱՍՄԻԿ ԲԱԴԱԼՅԱՆ
ՄՄ

ՍԵԻ ԼԵՈՆԵՐԻ ՇՈՒՄՐ ԽԱՆՂԱՌԵԱ ՎԱՆՔԸ
ԵՒ 1064 Թ. ՀԻՇԱՏԱԿԱՐԱՆԸ ԳՐԻԳՈՐ ՎԿԱՅԱՍԵՐԻ
ԳԱՅԱԿԱԼՈՒԹՅԱՆ ՍԿԶԲԻ ՍԱՍԻՆ¹

Միջնադարյան հայկական եւ օտարալեզու սկզբնաղբյուրներում ուշագրավ տեղեկություններ են հաղորդվում Անտիոքին սահմանակից Կիլիկյան Հայաստանի Սեւ լեռների (Ամանոսի) կամ, ինչպես արաբագիր հեղինակներն են երբեմն անվանել, «Հայկական լեռների»² շրջակայքում տեղակայված բազմաթիվ հայկական վանքերի³, եկեղեցիների, անապատների, դրանց անունների, ճարտարապետական առանձնահատկությունների մասին: Արաբական սկզբնաղբյուրները տվյալներ են հայտնում վերոհիշյալ կրոնական հաստատություններում բնակվող ճգնավորների ու քահանաների մասին⁴: Համաձայն այդ վկայությունների, Սեւ լեռներում գործել են 700 հայկական վանքեր՝ «բնակեցված» 700 եւ ավելի հոգեւորականներով: Պահպանված տեղեկություններից պարզ է դառնում, որ հայկական վանքերից յուրաքանչյուրը շրջապատված է եղել պարսպով, ունեցել է աշտարակ եւ վանականների բնակության համար կառուցված կացարաններ⁵: Այդ տարածքում եղել են նաեւ վանքեր, որտեղ սպասավորել են քիչ թվով (10 անդամ) վանականներ⁶: Վկայու-

¹* Ստացվել է՝ 4.04.2023, գրախոսվել է՝ 10.04.2023: Էլ. հասցե՝ hasbadalyan@gmail.com:

² Տե՛ս Գ. ԴԱՆԻԵԼՅԱՆ, Հայկական վանքերի եւ եկեղեցիների հիշատակություններ Աբու Ալ-Մաքարիմի երկի անհայտ էջերում, Երեւան, 2018, ԲՄ, 26, էջ 41:

³ J. J. S. WEITENBERG, The Armenian Monasteries in the Black Mountain, in: K. N. CIGGAAR, D. M. METCALF (ed.), East and West in the Medieval Eastern Mediterranean. I. Antioch from the Byzantine Reconquest until the end of the Crusader Principality. Acta of the Congress held at Hernen Castle in May 2003 (Orientalia Lovaniensia Analecta, 147), Leuven – Paris – Dudley/MA, 2006, p. 79–93: Գ. ԴԱՆԻԵԼՅԱՆ, նշ. աշխ., էջ 27–28:

⁴ Հստ արաբական աղբյուրի վկայության՝ «անհաշվելի» թվով վանականներ բնակվել են նաեւ Անտիոքի շրջակայքում, Կեսարիայում, Մարաշում, Տարսոսում եւ այլ վայրերում (տե՛ս Գ. ԴԱՆԻԵԼՅԱՆ, նշ. աշխ., էջ 41–42):

⁵ Նույն տեղում:

⁶ Նույն տեղում, էջ 42: Սկզբնաղբյուրային սուղ տեղեկությունների պատճառով վանքերի մեծ մասի տեղադրությունն ու անվանումներն անհայտ են:

թյունների հավաստիության վերաբերյալ կարծում ենք՝ աղբյուրներում հիշատակված վանքերի թվաքանակը չափազանցված է, սակայն այն հիմք է տալիս ենթադրելու, որ տարածքում եղել են մեծ թվով հայկական վանքեր, որտեղ բնակվել են բազմաթիվ հայ հոգեւորականներ:

Սեւ լեռների վանականների ու մենաստանների ճգնաժամների «բազմություն» մասին հաղորդում ունի նաեւ Արիստակես Լաստիվերցին, ըստ որի 1028 թ. Ռոմանոս կայսրը՝ «եկեալ հանդիպի լերինն, որ կոչի Սեաւ, եւ տեսանէ անդ բազմութիւն վանորէից եւ զմենաստանս մենակեցաց, որք ի մարմնի գոլով զանմարմնոցն բերէին զնմանութիւն: Որք միով այծէիւ կամ բաճկոնաւ շատանան... սոքա երկաթի բրիչ ի ձեռն առեալ՝ խոնջեալ աշխատին ի գարի սերմանեաց պատրաստեալ զօրապահիկն կերակուր»⁷: Սեւ լեռների «անթիւ» վանքերի ու «բազում» կրոնավորների մասին Մատթեոս Ուռհայեցին գրում է. «Յասմ ժամանակիս (1066 թ.—Հ. Բ.) զօրաժողով արար ամիրայն Պարսից՝ որ ասի Օշէն... Եւ գայր խաղայր բազմութեամբ զօրօք եւ արար ձմերոց ի Սեւ լեառն, եւ ահագին արեան հեղութիւն եւ կոտորած լինէր յամենայն գաւառն, եւ բազում անձինք ի սրբոց կրօնաւորացն մատնեցան ի բերան սրոյ... անթիւ վանորայք եւ գեղք այրեցան հրով...»⁸: ՄՄ թ. 1530 ձեռագրի (1154 թ.) հիշատակարանը հայտնում է. «Գնաց... ի յաշխարհն Կիլիկեցոց եւ եմուտ ի Սեաւ լեառնն, ուր էին բազում անապատք եւ վանորայք...»⁹:

Համաձայն աղբյուրների հաղորդումների, ԺԱ.—ԺԲ. դարերում Սեւ լեռներում գործել են նաեւ ասորական, հունական, լատինական եւ վրացական վանքեր¹⁰: Չնայած դավանաբանական տարակարծություններին՝ բազմազգ վանականները բնակվել են կողք կողքի եւ համագործակցել: Եկեղեցական համայնքների համագործակցության ու փոխազդեցության արդյունքում վանականության կյանքում ձեւավորվել է մտածողության,

⁷ Տե՛ս «Պատմութիւն Արիստակիսի Լաստիվերցոյ», աշխատասիրությանը՝ Կ. Յուզբաշլանի, Երեւան, 1963, էջ 42–43):

⁸ Տե՛ս ՄԱՏԹԷՈՍ ՈՒՐՀԱՅԵՑԻ, Ժամանակագրութիւն, աշխատասիրությանը՝ Հր. Բարթիկյանի (այսուհետ՝ ՄԱՏԹԷՈՍ ՈՒՐՀԱՅԵՑԻ), Երեւան, 1973, էջ 200:

⁹ Տե՛ս Ա. ՄԱԹԵՒՈՍՅԱՆ, Հայերեն ձեռագրերի հիշատակարաններ, Ե.—ԺԲ. դդ. (այսուհետ՝ Հիշ.), Երեւան, 1988, էջ 171:

¹⁰ 969–1084 թթ. Սեւ լեռների՝ որպէս հույն, վրացի, հայ վանականների բնակատեղիի, բյուզանդական վանական կյանքի, գիտական գործունեության ու ծաղկող մշակույթի կենտրոնի մասին տե՛ս JOE GLYNIAS, Byzantine Monasticism on the Black Mountain West of Antioch in the 10th-11 Centuries, Studies in Late Antiquity, 2020, vol. 6, issue 4, pp. 408–451: Սեւ լեռների տեղագրության, վանքերի, վանական բնակչության մասին տե՛ս Կ. Մուրաֆյան, Կիլիկիան կայսրությունների խաչմերուկում, թարգմ.՝ Ա. Շահումյան, Երեւան, 2001, էջ 312–315:

կրթության, գիտության, արվեստի զարգացման որոշակի մակարդակ: Այս միջոցով բարենպաստ ազդեցություն է ունեցել հայ վանական, հետագայում Կիլիկիայի հայկական մշակույթի վրա¹¹:

ԺԱ. դարավերջից եւ ԺԲ. դարասկզբից Կիլիկյան հայկական պետության հիմնադիր Ռուբինյանների իշխանապետության ժամանակաշրջանում Սեւ լեռների հայկական վանքերում, նաեւ իշխանական աջակցությամբ եւ հովանավորությամբ, հիմնադրվել են դպրոցներ ու վարդապետարաններ, կազմավորվել միաբանություններ: Այս կենտրոններում կրթվել կամ գործել են հոգեւորականներ, քաղաքական, գիտական ու մշակութային գործիչներ: Նրանց թվում են Գրիգոր Բ Վկայասերը, Գրիգոր Պահլավունին, Իգնատիոս Սեւեռնեցին, Ներսես Լամբրոնացին, Ներսես Շնորհալին, Մխիթար Գոշը, Գեւորգ Մեղրիկը, Գրիգոր Լոռեցին, Կիրակոս գիտնականը եւ ուրիշներ:

Սեւ լեռների հայկական վանքերից հիշվում են Պառլահոնը, Արեգը, Շուղը, Վարդկանը, Մաշկեւորը, Քարաշիթը, Հեսվանցը ինչպես նաեւ Բարսեղյանց, Շափիրի եւ Պաղակձիակ կենտրոնները¹²: Գրչարվեստի պատմության տեսակետից հետաքրքրական է յուրաքանչյուր վանքի պատմության, գործունեության եւ գրչական ժառանգության ուսումնասիրությունը: Ներկա հոդվածում հայագիտության մեջ հայտնի եւ նոր սկզբնաղբյուրների ու նյութերի հիման վրա ներկայացնում ենք Սեւ լեռների վանական մշակութային օջախներից Շուխր խանդառեա վանքի պատմության ու գրատան գործունեության ուսումնասիրությունը:

Շուխր խանդառեա¹³ վանքի պատմությունը սկսվել է Բյուզանդական տիրապետության ժամանակաշրջանում: Վանքի անունը¹⁴ միայն մեկ ան-

¹¹ Տէս Ղ. ԱԼԻՇԱՆ, Սիսուան, Վենետիկ, 1885, էջ 403–405, Լ. ՏԵՐ-ՊԵՏՐՈՍՅԱՆ, Ասորիների դերը հայկական Կիլիկիոյ մշակութային կեանքում ԺԲ.–ԺԳ. դարերում, Հայագիտական մատենադարան «Բազմավէպ», հմր. 28, Վենետիկ, 1989, է. ՇԻՐԻՆՅԱՆ, Դպրոցությունը Կիլիկյան Հայաստանի Սեւ լեռան հայկական վանքերում, ԲՄ, 21, Երեւան, 2014, էջ 351–362, «Ղեւոնդ Արիշանը Սեւ լեռան վանքերի մասին», Հ. Ղեւոնդ Արիշան – 200, հոբելյանական գիտաժողովի նյութերի ժողովածու, Երեւան, 2021, էջ 70–81:

¹² Տէս Ղ. ԱԼԻՇԱՆ, Սիսուան, էջ 66, Հ. ՈՍԿԵԱՆ, Կիլիկիայի վանքերը, Վիեննա, 1957, էջ 281–283:

¹³ Շուղը խանթարչա անվամբ լեռնանցք կա Կիլիկիայում: Այսպես է կոչվում Զեյթունի միջնաբերդի հարավային ստորոտի նեղ ձորահովիտը Շուղը կամրջի հետ միասին, տես «Հայաստանի եւ հարակից շրջանների տեղանունների բառարան, կազմեցին Թ. Հակոբյան, Ս. Մելիք-Բախչյան, Հ. Բարսեղյան, հտ. 4, Երեւան, 1998, էջ 158–159: Շուղը անունով բերդ:

¹⁴ Ղ. Արիշանի կազմած՝ Սեւ լեռների վանքերի ցանկում Շուխր խանդառեա անունը հիշատակված է թեական՝ «Շուխրաւանդորեայ» ձեւով (տես Ղ. ԱԼԻՇԱՆ, Սիսուան, էջ 66):

գամ հիշատակվում է 1064 թ. օրինակված մատյանի գրչի հիշատակարանում: Գրչագիրը Սեւ Լեոնեռի գրչության կենտրոններից մեզ հայտնի ամենավաղ թվագրված ձեռագիրն է: Հայտնի չէ՝ հոգեւոր կառույցը պատկանել է ասորիներին, հույներին, թե հայերին: Անհայտ է նաեւ, թե վանքում գործունեության ինչ միջավայր է տիրել: Տեղանունից դատելով՝ կարծում ենք, Շուխր խանդառեա վանքը նախկինում ասորական է եղել, հիմնարկվել եւ գործել է հավանաբար ԺԱ. դարասկզբից, որը հետո հայերը վերածել են հայկական հոգեւոր եւ գրչական կենտրոնի¹⁵: Հ. Ոսկյանի կարծիքով՝ վանքը «թերեւս օտար ազգի մը պատկան, ուր սակայն գտնուած են հայ միաբաններ այս՝ ինչպէս այսօր՝ այդ շրջաններուն ալ անսովոր չէր»¹⁶:

Ըստ հիշատակարանային վկայության՝ Շուխր խանդառեա վանքը գործել է «ընդ հովանեաւ Սուրբ Սիրովնի»¹⁷: Վանքի կառուցման վայրը, աշխարհագրական միջավայրը, «Սուրբ Սիրոն» եկեղեցու շինության հանգամանքները պարզելու համար որեւէ տեղեկություն չի հաղորդվում: Թերեւս տեղորոշման մասին միակ վկայություն կարելի է դիտարկել վանքի անունը: «Շուղը» տեղանունը ասորական ծագում ունի. «սաղը» ասորական բառի կամ «շաղը» արաբական բառի հոգնակի ձեւն է՝ «շուղը», «շուղուր», եւ նշանակում է «անցք», «կիրճ», «ճեղք», «սահման»¹⁸: Այս ստուգաբանությունից կարելի է ենթադրել, որ վանքը կառուցվել է կիրճի մեջ կամ նրան հարակից տարածքում:

Պատմականորեն Շուղը անունը կրում են Լեոնային Կիլիկիայում իրար մոտ գտնվող երկու վանք: Մեկը կառուցվել է Ադանայի Մարաշի գավառում, Շուղը գյուղի մոտակայքում, Շուղը կիրճի մոտ¹⁹: Իսկ երկրորդը Շուղրի Կարմիր վանքն է, գտնվել է Գող Վասիլի²⁰ իշխանության տիրույթում՝ Քեսունի մոտ²¹: Ուսումնասիրողները այս վանքերը երբեմն

¹⁵ Ասորական սկզբնաղբյուրները հայտնում են, որ Կիլիկիայի եւ Հյուսիսային Ասորիքի մի շարք հայկական վանքեր ժամանակին պատկանել են ասորիներին (տե՛ս Լ. ՏԵՐ-ՊԵՏՐՈՍՅԱՆ, նշ. աշխ., էջ 45):

¹⁶ Հ. ՈՍԿՅԱՆ, նշ. աշխ., էջ 266:

¹⁷ Եղմ. 1924, ն. ՊՈՂԱՐԵԱՆ, Մայր ցուցակ հայերէն ձեռագրաց Սրբոց Յակոբեանց, հտ. 2., (այսուհետ՝ Ցուցակ), Երուսաղէմ, 1972, էջ 400:

¹⁸ Ասորական «Սաղը» բառաձեւը պահպանվել է Լամբրոնի մոտ Սաղրուի Ս. Աստվածածին վանքի անվամբ (տե՛ս Հ. ՏԵՐ-ՂԱԶԱՐԵԱՆ, «Շուղրի անապատը եւ Կարմիր վանքը», «Հայագիտական հասկ», Ա. տարի, Անթիլիաս, 1948, էջ 107–109):

¹⁹ «Հայաստանի եւ հարակից շրջանների...», հտ. 4, էջ 158, 159:

²⁰ ՀՐ. ԱՃԱՌՅԱՆ, Հայոց անձնանունների բառարան, հտ. 5, Երեւան, 1962, էջ 55–56:

²¹ Հայաստանի եւ «հարակից շրջանների...», հտ. 3, Երեւան, 1991, էջ 58: Գրիգոր Վկայասերը վանքում գումարել է մեծ եկեղեցական ժողով (տե՛ս Ղ. ԱԼԻՇԱՆ, Սիսուան,

շփոթել են: Ղ. Ալիշանը գրում է. «Ոմն ընդ մէջ Մարաշոյ եւ Սսոյ ասէ, ոմն յերի Քեսնոյ, իսկ այլ ոմն ի հնոց՝ ստուգագոյն տայ նշան ըստ իւրում գիտութեան, «մերձ ի Նոր քաղաք» ասելով, այլ աւա՛ղ, զի անծանօթ է մեզ եւ տեղի Նորոյ քաղաքիդ»²²: Շուղր անապատը, ըստ Ղ. Ալիշանի, գտնվել է Սեւ լեռների «յամուր կողմանս»²³՝ «յերկիր իշխանութեան Գող Վասիլի առ կռան Կիլիկիոյ ու Մարաշոյ: Երկոցուն սոցին եւ լերանցս սահմանորդ էր հռչակագոյն մենաստանն Շուղր Անապատ»²⁴:

Ներսէս Շնորհալու վկայությունից հայտնի է դառնում, որ Շուղր վանքը գտնվել է Սեւ եւ Տորոս լեռների միացման հատվածում կամ սահմանագծում՝ «Մինչ ի Տաւրոս լեառն հասեալ/... Ի վայելուչ յայն վայր եկեալ/ Հովուապետին զգաւնացեալ/ Ի Սեաւ՝ Մթին լեառն անուանեալ/ Ուր են հոգիք լուսաւորեալ» կամ «Ի յանապատ իմն բնակեալ/ Ի մէջ լերանցն Շուղր անուանեալ»²⁵:

Հ. Տեր-Ղազարյանը Շուղր վանքի տեղանքի մասին գրում է հետեւյալը. «Շուղրը կը գտնուի Անտէրունի լեռնադաշտին մէջ, Մարաշէն դէպի Սիս տանող ճամբուն վրայ, Ենիճէ Գալէ գիւղին մօտ՝... աւերակներով

էջ 407): Մատթեոս Ուռհայեցու համաձայն՝ Շուղր վանքում է թաղվել Բարսեղ Անեցի կաթողիկոսը (տե՛ս ՄԱՏԹԵՈՍ ՈՒՐՀԱՅԵՑԻ, էջ 360: «Յայմաւուրքի» մէջ ասվում է. «...եւ ապա ինքն (Բարսեղ.— Հ.Բ.) վախճանեցաւ եւ թաղեցաւ անդէն ի Շուղրն՝ մօտ ի տէր Գրիգորիս» (տե՛ս Գ. ՀՈՎՍԷՓԵԱՆ, Յիշատակարանք ձեռագրաց, հտ. Ա. (այսուհետ՝ Հիշ.), Անթիլիաս, 1951, էջ 421), Մ. ՉԱՄՉԱՆՅԱՆ, Հայոց պատմութիւն, հտ. Գ., Երեւան, 1984, էջ 35: Շուղր վանքին եւ նրա տեղադրութեան անդրադարձել են նաեւ Հ. Նալբանդյանը (տե՛ս Արաբական աղբյուրները Հայաստանի եւ հարեւան երկրների մասին. Յակոբ ալ-Համաւի, Աբու-Ֆիդա, Իբն Շադդադ, կազմեց՝ Հ. Նալբանդյան, Երեւան, 1965, էջ 84, 180–181, ծան. 243), Ղ. Ինճիճյանը (տե՛ս Ղ. ԻՆՃԻՃԵԱՆ, Աշխարհագրութիւն չորից մասանց աշխարհի՝ Ասիոյ, Եւրոպիոյ, Ափրիկոյ եւ Ամերիկոյ, մասն առաջին. Ասիա, հտ. Ա., Վէնէտիկ, 1806, էջ 376), Հ. Գալուստյանը (տե՛ս Հ. ԳԱԼՈՒՍՏԵԱՆ, Մարաշ կամ Գերմանիկ եւ Հերոս Ջէյթուն, Նիւ Եորք, 1934, էջ 234, Ա. սրկ. Մանդալյան (տե՛ս Ա. ՄԱՆԳԱԼՅԱՆ, Շուղր անապատի Կարմիր վանքը, «Էջմիածին», 1978, Ը.—Թ., էջ 91–98):

²² Ղ. ԱԼԻՇԱՆ, Սիսուան, էջ 406–407:

²³ «Գնաց յաշխարհն Կիլիկեցոց ինքն կաթողիկոսն Բարսեղ, եւ եմուտ ի լեառն Սեաւ... եւ յայնմ ժամանակի հալածումն եհաս յաշխարհն Հայոց՝ յազգէն Իսմայէլի, եւ բազում գաւառք ու վանորայք աւերեցան, ու մնացեալքն փախստական լինէին յամուր կողմանս...» (տե՛ս Ղ. ԱԼԻՇԱՆ, Սիսուան, էջ 406, հմտ. Ա. ՄԱՏԹԵՈՍՅԱՆ, Հիշ., էջ 171):

²⁴ Ղ. ԱԼԻՇԱՆ, Սիսուան, էջ 406:

²⁵ ՆԵՐՍԷՍ ՇՆՈՐՀԱԼԻ, Վիպասանութիւն, Մատենագիրք Հայոց, հտ. ԻԱ., Երեւան, 2018, էջ 125, 127: Շուղր անապատում է կրթվել Ներսէս կաթողիկոսը. «Սղոն օրինակ եւ սա (Ներսէս Շնորհալին.— Հ.Բ.) ի Սեաւ լերինն միայնարանս բնակէր միշտ պարապեալ ընթերցման Սուրբ գրոց եւ աստուածախօս աղօթից: Եւ դադարեալ ի նոյն ճգնութիւն ամս բազումս՝ գայր յետ ժամանակի ի սահմանս Քերսոն քաղաքի առ աստուածասէր իշխանն Վասիլ մակալոյնցեալն Գող» (տե՛ս ՆԵՐՍԷՍ ՇՆՈՐՀԱԼԻ, Պատմութիւն Վարուց, Սոփերք, ԺԴ., Վենետիկ, 1854, էջ 29–30):

հարուստ փոքրիկ գիւղակ մը: ...Շուղը գիւղին միջնաբերդակին վրայ շինուած է Շուղրի հոշակաւոր վանքը: Մինչեւ մեր գաղթականութեան տարին Մայր եկեղեցին կամ վանքը կիսաւեր վիճակ մը կը ներկայացնէր, խորանին վրայի տանիքը դեռ հաստատուն կը կենար, բլրակին շուրջն ու ստորոտը բազմաթիւ հիւրանոցներ կը գտնուէին փլատակուած վիճակի մէջ...»²⁶:

Շուղը վանքը նույնացվել է Սեւ լեռների Բարսեղանց վանքի հետ: Նման կարծիք է հայտնել հայագետ Դյուլորիեն²⁷: Ըստ Ղ. Ալիշանի՝ այս երկու վանքերը տարբեր վանական հաստատություններ են²⁸:

Հակասական կարծիքներ կան նաեւ Շուղը անապատի եւ Շուխր խանդառեա վանքերի վերաբերյալ. Գ. Հովսեփյանը նույնացրել է վանքերը, իսկ Հ. Տեր-Ղազարյանը դրանք դիտարկել որպէս տարբեր կառույցներ²⁹: Առանց փաստական հիմքերի Հ. Տեր-Ղազարյանը գտնում է, որ Ս. Սիովնի վանքը գտնվել է Զեյթունի միջնաբերդի ստորոտում եւ «մինչեւ հիմա կը պահէ այդ անունը զեյթունցիներուն մոտ»³⁰: Կարծում ենք՝ Շուխր խանդառեա եւ Շուղը անվանաձեւերի տարբերությունը թույլ է տալիս վանքերը դիտել որպէս տարբեր հոգեւոր կենտրոններ:

Շուխր խանդառեա վանքից մեզ հասած միակ ժառանգությունը վերը նշված Ավետարան մատյանն է³¹: Մատյանը արժեքավոր է իր հնությամբ ու եզակի՝ որպէս կարեւոր սկզբնաղբյուր: Զեռագիրը պահվում է Երուսաղեմի Ս. Հակոբյանց վանքի ձեռագրատանը. այն նկարագրել են Ն. Պողարյանը եւ Գ. Հովսեփյանը³²: Ընդհանուր առմամբ գրչագիրը լավ է պահպանվել: Մեծագիր մատյանը (97x27x10 սմ) կազմված է «թանձր» մագաղաթյա 282 թերթից, գիրը խոշոր երկաթագիր է, իսկ խորագրերն

²⁶ Տէս Յ. Տէր-ՂԱԶԱՐԵԱՆ, Հայկական Կիլիկիա, 1966, Անթիլիաս, էջ 245:

²⁷ Ղ. ԱԼԻՇԱՆ, Սիսուան, էջ 407:

²⁸ Նույն տեղում:

²⁹ Տէս Գ. ՅՈՎՍԷՓԵԱՆ, Հիշ., էջ 247: Ղ. Ալիշանը վանքերը ներկայացրել է առանձին (տե՛ս Ղ. ԱԼԻՇԱՆ, Սիսուան, էջ 66):

³⁰ Յ. Տէր-ՂԱԶԱՐԵԱՆ, նշ. աշխ., էջ 245: Մեկ այլ հոգվածում Յ. Տեր-Ղազարյանը բացատրում է «խանդառեա» բառի նշանակությունը. «Կանտառոյ, կամար... կամ աւելի շիտակը կամուրջ ըսել է» ու եզրակացնում, թէ «ԺԱ. դարուն այժմու Զեյթունը ծանօթ էր միմիայն Շուխր խանդառի անունով» (տե՛ս «Շուխր խանդառայի սուրբ Սիսովնի վանքը», «Բազմավէպ», հ. 10–12, 1952 թ., էջ 242):

³¹ Ղ. Ալիշանը իր ուսումնասիրություններում այս ձեռագիրը չի հիշատակում:

³² Ն. ՊՈՂԱՐԵԱՆ, Յուցակ, էջ 397–400, Գ. ՅՈՎՍԷՓԵԱՆ, Հիշ., էջ 245–248, Սիոն, 1933, էջ 415, Ա. ՄԱԹԵՆՈՍՅԱՆ, Հիշ., էջ 103–104: Զեռագիրը թվայնացված է (հղում՝ <https://www.loc.gov/resource/amedmonastery.00271073987-jo/?sp=6>):

ու լուսանցքային համարագրերը՝ մանր անկյունավոր երկաթագիր, գրությունը՝ երկայուն՝ սեւ թանաքով, ունի 19 տող: Ձեռագիրը զարդարված է խորաններով, ավետարանիչների համատեղ նկարներով, հատվածների սկիզբը՝ կլոր կամ անկյունավոր գծազարդերով՝ երբեմն գունավորված: Ն.Պողարյանը մատյանի նկարչական արվեստը գնահատել է «նախնական եւ ոչ նուրբ, բայց յոյժ շահեկան», իսկ Գ. Հովսեփյանը՝ «հնագույն եւ պրիմիտիւ... տեղ տեղ սասանեան ոճով են»: Հետաքրքիր է գրչագրում չորս ավետարանիչների նկարի ստորին լուսանցքում գրված անթվական հիշատակարանի գրչի՝ հավանաբար ձեռագրի գրչության ժամանակակցի հստակ գնահատականը. «Կարծեմ գրագիրն, որ գրեց զԱւետարանս, ինքն ոչ է հանել զայս պատկերնիս. եւ այս ստոյգ յերեւի, որ չեն սոքա շատ աղուորք»³³: Գ. Հովսեփյանը կարեւորել է Ավետարանի մանրանկարչությունը հատկապես «Հայաստանից դեպի Կիլիկիա անցնելու լուսաբանութեան համար», միաժամանակ նկատել «գրեթէ նոյնութեան աստիճանի» աղերսներ Խանդավի (1041 թ.), ՄՄ 3784 (1057 թ.) եւ 974 (ԺԱ. դար) ձեռագրերի մանրանկարչության հետ³⁴:

Բուն ձեռագրի եւ հետին (Բ) կազմի միջեւ որպես պահպանակ տեղադրվել են ավելի հին մագաղաթյա երկաթագիր ձեռագրի երկու թերթ՝ գրված ժանգագույն թանաքով՝ մասամբ գունաթափ: Հավանաբար մեծադիր ձեռագրեր օրինակելը բնորոշ է եղել այդ ժամանակաշրջանին: Հայտնի չէ, թե պահպանակներն ինչ բովանդակությամբ բնագրի մասունքներ են եւ արդյոք մատյանը գրվել է Շուխր խանդառեա վանքում, թե այլ գրչության այլ կենտրոնում: Ձեռագիրը հավանաբար պահվել է վանքի մատենադարանում: Ավետարանը կաշեկազմ է, դրոշմազարդ՝ զարդարված արծաթե խաչով, ընկած արծաթե զարդերի մնացորդներով:

Ձեռագրի գլխավոր հիշատակարանը տեղեկացնում է գրչության հանգամանքների մասին: Մատյանն ընդօրինակել է Ստեփանոս «զյոգնամեղ զաշխատաւորս»: Համաձայն գրչի վկայության՝ Ստեփանոսը եղել է ոչ միայն «ցանկալի» ձեռագրի «զգրողս», այլ նաեւ «զգծաւղս»: Ձեռագիրը արտագրվել է 1064 թ. «ի վանքս կոչեցեալ Շուխր խանդառեայ», Կոստանդին Տուկիծ բյուզանդական կայսեր կառավարման տարիներին (1059–1067 թթ.)՝ «յինքիշխանակալութեան Յունա[ն]ց թագա-

³³ Տե՛ս Ն. Պողարեան, Յուցակ, էջ 398:

³⁴ Գ. Յովսէփեան, Յիշ., էջ 247:

ւորին Տուկծի»³⁵։ Հիշատակարանում կարգում ենք վանահայր Թումասի անունը՝ «գրեցաւ... յառաջնորդութեան հաւր Թումասու»³⁶։

Գրչագրի պատվիրատուներն են «միախորհք եւ միակրանք, հարազատ» Հակոբ, Բաներեգես եւ Կիպրիանոս կրոնավորները՝ «սպասաւորք եւ ծառայք սուրբ Յակովբայ, որ եմք ընդ իշխանութեամբ Սանուիեղի որդւոյ Թոփիլծի, մեծանուն պատրկի եւ աստուածասէր եւ բարեպաշտ տիկնոջն Սկիր [Ս]անուիելի, որ ստացաք զսուրբ աւետարանս ի մեր յարգար վաստակոց յաստուածածիր ընչից ի բարեխոսութիւն հոգւոց մերոց եւ մեր ծնողացն»³⁷։

Զեռագրի հիշատակարանը կարեւոր սկզբնաղբյուր է հատկապես Գրիգոր Վկայասեր կաթողիկոսի աթոռակալության տարիների ուսումնասիրութեան հարցում։ Ներկա հոգւածի նպատակից դուրս է վերոհիշյալ հարցի ողջ պատմութեան քննութիւնը. կսահմանափակվենք միայն տվյալների ներկայացմամբ։ Ավետարանի հիշատակարանը հայտնում է, որ մատչանը գրվել է «ի հայրապետութեանն տեառն Գրիգորիսի»։ Հայտնի է, որ Պետրոս Գետադարձ եւ Խաչիկ Բ Անեցի կաթողիկոսներից հետո հայրապետ է ընտրվել Գրիգորիսը՝ Գրիգոր Վկայասերը։ Թե՛ միջնադարյան հայ ժամանակագիրները, թե՛ արդի հետազոտողները³⁸ տարբեր տարեթվերով են թվագրում Գրիգոր Վկայասերի եւ

³⁵ Պատմիչները ներկայացնում են Տուկիծի վարած քաղաքականութիւնը ոչ քաղկեդոնականների հանդեպ. «Յարուցանէր հալածանս քրիստոնէից. եւ առնէր քննութիւն հաւատոյ եւ կամէր ամենայն ջանիւ դարձուցանել զՀայոց քրիստոնեայքն ի դաւանութիւն Քաղկեդոնի» (տե՛ս Տարեգիրք Սմբատայ սպարապետի, Փարիզ, 1859, էջ 75)։ Մատթեոս Ուռհայեցին հայտնում է. «Կոստանդին Տուկիծ կայսր, որ իր իշխանութեան առաջի օրէն խորհեցաւ խորհուրդ չար, եւ կամեցաւ բռննալ եւ խափանել զաթոռ հայրապետութեան սրբոյն Գրիգորի ի տանէն Հայոց» (տե՛ս ՄԱՏԹԷՈՍ ՈՒՌՀԱՅԵՑԻ, էջ 164)։

³⁶ Ն. ՊՈՂԱՐԵԱՆ, Յուցակ, էջ 400։

³⁷ Զեռագրի հետագայի անթվական հիշատակագրութիւններից մեկը մատչանի «փրկաւորման» մասին է։ Հովհաննես Երեցը հիշում է Կուդանին՝ «տուողին զԱւետարանս» եւ նրա դստերը, ով մատչանը փրկել է «ի Մանիքեցեցն եւ ի Թորքերոյն»։ Մյուս հիշագրութիւնը նորոգութեան մասին է. Բաբերդացի Մարտիրոսը նորոգել է տվել Ավետարանը՝ «ի հիշատակ ինձ մեղապարտիս եւ ծնողաց իմոց» (տե՛ս Ն. ՊՈՂԱՐԵԱՆ, Յուցակ, էջ 400–401)։

³⁸ ՄԱՏԹԷՈՍ ՈՒՌՀԱՅԵՑԻ, էջ 150–155, ԿԻՐԱԿՈՍ ՓԱՆՋԱԿԵՑԻ, Պատմութիւն Հայոց, աշխատասիրութեամբ Կ. Մելիք-Օհանջանյանի, Երեւան, 1961, էջ 89–100, Մանր ժամանակագրութիւններ. XIII–XVIII դդ., հ. II, կազմեց Վ. Հակոբյան, Երեւան, հտ. 2, 1956, էջ, 339, G. DÉDÉYAN, Les Arméniens entre Grecs, Musulmans et Croisés, Etude sur les pouvoirs Arméniens dans le Proche-Orient Méditerranéen (1068–1150), vol. 1, Aux origines de l'Etat Cilicien: Philarete et les premiers Roubeniens, vol. 2, De L'Euphrate au Nil: Le réseau diasporique, Lisbonne, 2003. ՍԱՄՈՒԷԼ ԱՆԵՑԻ Եւ Շարունակողներ, Ժամանակագրութիւն, աշխատասիրութեամբ Կ. Մաթեոսյանի, Երեւան, 2014, էջ 189–191, Մ. ՕՐՓԱՆԵԱՆ, Ազգապատում, հտ. Ա., Ս. Էջմիածին, 2001, էջ 1467,

նրան նախորդող երկու կաթողիկոսների հայրապետության տարիների տեղումնությունը: Կարելոր է արձանագրել, որ կաթողիկոսները իրար հաջորդել են ընդունված կարգով. կաթողիկոսը ընտրվում էր նախորդի մահից հետո³⁹: Այսպես, ներկայացնում ենք Պետրոս Գետադարձի (1019–1058 թթ.) եւ հաջիկ Բ (1058–1064 թթ.) կաթողիկոսների աթոռակալության տարիների արձանագրված շեղումները. Պետրոս Գետադարձ՝ 1019/1020–1053/1054, 1058 թթ., հաջիկ Բ Անեցի՝ 1053/1054/1058–1063/1064/1065/1066 թթ.: Ամենատարածված տեսակետի համաձայն՝ Գրիգոր Վկայասերը կաթողիկոսություն է ընդունել 1066 թ. եւ այս փաստը երբեմն մեքենայորեն տարածվել է հարցին առնչվող աշխատություններում եւ հոգվածներում: Համաձայն ուսումնասիրվող հիշատակարանի հստակ թվագրված վկայության՝ Գրիգորը արդեն 1064 թ. հիշվում է որպես հայրապետ: Հարկ է նշել, որ Գրիգոր Վկայասերի գահակալության տարիների հարցով զբաղվող հետազոտողների ուշադրությունից վրիպել է այս եզակի սկզբնաղբյուրը:

Այսպիսով, Գրիգոր Վկայասերը ընտրվել է հայրապետ ոչ թե 1066 թ., այլ 1064 թ., եւ կաթողիկոսությունը տեւել է 41 տարի (1064–1105 թթ.): հաջիկ Բ. Անեցի կաթողիկոսը մահացել է ոչ թե 1066 թ., այլ 1063 կամ 1064 թ.՝ աթոռակալելով Պետրոս Գետադարձ կաթողիկոսի մահից հետո վեց տարի: Ստացվում է, որ հաջիկ Բ Անեցու մահվան եւ Վկայասերի հայրապետության ընտրության միջեւ տարիների ընդհատում չի եղել, եւ կաթողիկոսական աթոռի երկարաժամկետ թափուր մնալու մասին տեղեկությունները վիճարկելի են:

Շուրս խանդառեա վանքն իր արժեքավոր ձեռագիր հուշարձանով առանձնահատուկ տեղ ունի հայ գրչարվեստի պատմության մեջ: Ենթադրելի է, որ վանքի գրատան գործունեության ընթացքում արտագրվել եւ նկարազարդվել են տարբեր բովանդակությամբ մատյաններ: Այն հանգամանքը, որ վանքի գրիչները կատարել են այլ վանքերից ստացած ընդօրինակման պատվերներ, խոսում է նրանց հմտության ու ճանաչված լինելու մասին:

1470, 1479, 1488–1494, Հ. ԲԱՐԹԻՎՅԱՆ, Պետրոս Ա. Գետադարձ եւ Կոստանդին IX Մոնոմախ, Հայ-բյուզանդական հետազոտություններ, հտ. Ա., Երեւան, 2002, էջ 593–600, Բ. ՎԱՐԳԱՆՅԱՆ, Հայոց տոնացույցը (4–18-րդ դարեր), Երեւան, 1999, էջ 561–563, Վ. ԹՈՐՈՍՅԱՆ, Հայոց կաթողիկոսական իշխանությունը (ԺԱ. դարի կեսեր–ԺԲ. դարի սկիզբ), Երեւան, 2018, էջ 13–44 եւ ուրիշներ:

³⁹ Տես Կ. ՄԱԹԵՒՈՍՅԱՆ, Անին եւ անեցիները, Երեւան, 2021, էջ 34:

ՀԻՄՆԱԲԱՌԵՐ

Բյուզանդիա, Անտիոք, Շուրի անապատ, Կարմիր վանք, Քեսուն, Կոստանդին Տուկիժ, Պետրոս Գետադարձ, Խաչիկ Բ Անեցի, Գրիգոր Վկայասեր:

РЕЗЮМЕ

История, духовно-просветительская и культурная деятельность армянских монастырей в Черных Горах Киликии является одной из наименее изученных областей арменоведения. Статья посвящена истории монастыря Шухр Хандарея, одного из монашеских культурных центров Черных Гор, и оценке наследия скриптория. Единственная рукопись, дошедшая до нас из монастыря Шухр Хандарея – Евангелие 1064 года, древнейшая датированная рукопись из скрипториев Черных Гор. Колофон рукописи – важный первоисточник для уточнения срока правления католикоса Григора II Вкаясера. Согласно наиболее распространенной точке зрения, Григор II возглавил католикосат в 1066 году. В памятной записи шухрской рукописи указана дата, согласно которой Григор II Вкаясер стал католикосом не в 1066 году, как считалось ранее, а в 1064, и занимал престол в течение 41-го года (1064–1105).

SUMMARY

The history, spiritual, educational and cultural activities of the Armenian monasteries in the Black Mountains of Cilicia is one of the least studied areas of Armenology. The article is devoted to the history of the monastery of Shukhr Khandarea, one of the monastic cultural centers of the Black Mountains, and to the assessment of the heritage of the scriptorium. The only surviving manuscript from the monastery of Shukhr Khandarea is the Gospel of 1064, the oldest dated manuscript from the scriptoriums of the Black Mountains.

The colophon of the manuscript is an important primary source for clarifying the term of the reign of Catholicos Gregory II the Martyrophile. According to the most widespread point of view, Gregory became the head of the Catholicosate in 1066. The colophon of the Shukhr Khandarea manuscript indicates a date, according to which Gregory the Martyrophile became Catholicos not in 1066, as it was considered earlier, but in 1064, and reigned for 41 years (1064–1105).